

四庫全書

集部

欽定四庫全書

集部
吳隱集卷二

詳校官司業_臣納麟寶

中書_臣劉源溥覆勘

總校官進士_臣朱 鈐

校對官編修_臣周 鏞

謄錄監生_臣李致祥

欽定四庫全書

集部六

巽隱集

別集類五 明

提要

臣等謹案巽隱集四卷明程本立撰本立字
原道巽隱其號也桐鄉人洪武九年以明經
擢秦王府引禮舍人以母憂去復補周府禮
官坐累謫雲南馬龍他郎甸長官司吏目有
平定百夷功徵入翰林歷官至右僉都御史

調江西按察副使未行值燕王篡位遂自盡
以殉事迹具明史本傳是集詩二卷文二卷
為其曾孫山所編弘治乙丑桐鄉知縣莆田
李廷梧序之嘉靖初南溪吳氏為刊板西虞
范氏又重刊之歲久皆散佚此本乃萬厯乙
丑桐鄉知縣濮陽渠購得遺稿於其裔孫九
澤而屬訓導李詩校刊者也本立文章典雅
詩亦深穩樸健頗近唐音不但節義為足重

即以詞采而論位置於明初作者之間亦無愧色矣乾隆四十六年十月恭校上

總纂官

臣紀昀臣陸錫熊臣孫士毅

總校官 臣陸費墀

欽定四庫全書

巽隱集卷一

明程本立撰

紀行

使泐江發大梁水驛

蔡河雪消春水生使者發船將遠行得遇鄉里雖慰意
卻念妻子難為情草埋金谷樓前路潮打錢塘江上城
南北登臨總懷古船中有酒且須傾

舟中雜興

蔡河百折到沙河沙河入淮風浪多使者官船夜須發
奈爾長淮風浪何

十日舟行不見山沙河多似蔡河灣舟人忽報安豐近
指點數峯煙雨間

昨夜雨來風更顛淮河北口且灣船今朝浪靜張帆去
蓬底看山不礙眠

野色空青帶薄嵐水光深黑入洄潭望到中都三百里

好山不斷似江南

過寶應

柳拂津亭春霧開
纜牽官舸鼓聲催
邑中舊尹人能說
湖上新堤客再來
劫火空城遺鴈塔
惡風深浪沒龍堆
若過甌社看明月
切莫探珠老蚌胎

過甌社湖

平湖一目到天涯
明月滿空飛浪花
半夜珠胎遺老蚌
有時金背出妖蜃
漁人屋近燈纔見
使者舟行鼓亂槳

金史卷一百一十五
卷一
便似吳淞江上路只無紅槳唱雙娃

到京口驛

萬里長江風浪平羣山奔走入神京
船頭醜酒晴開港馬首張燈夜到城
南去北來須白髮東漸西被盡蒼生
明時食祿曾何補只寫聲謠記所行

許州東屯雜詩六首

東屯歸欲晚西澗立多時
病眼青山怪幽情白鳥知
十年無舊業九日有新詩
採得薤根菊馨香好遺誰

農功將築圃使者正行田車過聞牛鐸詩成墮馬鞭涼
風蘋末起落日樹頭圓翻憶吳淞岸菱歌處處船
出郊觀穫稻下馬立斜暉百頃黃雲捲千鎌白月飛莫
辭官有賦但使願無違農器消兵甲時清歲不饑
死戰開邊土生還落野屯時清無盜賊頭白有兒孫春
稻霜餘粒移桑雨後根百年須飽煖此外復何言

丘原莽蕭瑟客子暮徘徊山是釣州起河從鄭邑來衣
冠餘古墓歌舞只荒臺野哭誰家婦秋聲助爾哀

徑捷車行少溪深馬渡遲地臨長社邑民指太丘祠所
歷多懷古予生豈好詩據鞍吟復嘯風雨忽淒其

雪中發中牟

華軒照白髮使節來清霄行人勿畏避丈夫戒矜驕衢
路寬逾坦塵沙淨不飄高懷樂清景予以永今朝石田
已種玉吾將采瓊瑤瓊瑤遺所思所思不可招

過漢魯中牟廟

魯公宰中牟千載民弗忘我車式祠下紆鬱感中腸公

昔為政日異聲動四方野桑有馴雉田稼無飛蝗倘非
司徒使厥美亦莫彰宰邑幾何人孰繼芝蘭芳催科簿
書急應接趨走忙人亡政化息俯仰思循良

發鄭州

駕轅指嵩洛發軔涉京須兩厓忽剗削一徑中縈紆
惟命低褰雨雪恐霑濡端居豈不樂顧乃興嘆吁僕夫
盡徒跣軌轍多泥塗仁者念同胞飢寒切吾軀行行敢
中止戒之以徐驅

過虎牢

鴻溝楚漢割虎牢晉鄭交周衰逮秦亡海內爭雄虢生
民亦何罪殺戮如刈茅至今戰爭地鬼哭熊晝號汜水
去汨河廣武來嵯嶠浩歌入深峪悲風起山坳

出蓼子峪

羣山入鞏洛渴驥奔黃河行人山之下窄徑緣坡陀單
車不方軌峭壁臨盤渦上有虎豹嗥下有飢蛟鬪垂堂
夙所戒叱馭今重過微忠効馳駟神物煩撫呵

過黑石渡

邛山障黃河洛水崩黑石方舟載車馬煙雨行人立我
昔將王命北渡祠河伯茲來復輶傳觀者笑曾識聖君
禹功齊神龜當復出

出洛陽城

輓車上天津伊闕當我前連峯左右起奔走相後先古
來五嶽內嵩高極中天儀形正四表襟帶流三川河山
固王室豈直金城堅漢業此中興周都見東遷壯遊快

一覽遺跡悲千年頽垣舊誰禁野蔓淒朝煙

重到許州屯

士卒懽迎馬首羅舊時行處復來過荷父孰與耕田樂
拔劍無煩斫地歌日落兩屯煙盡起雨餘雙淚水偏多
強拈薄酒憐人意壺榼頻傾奈爾何

發中都水驛次韻金應奉李編修紀行倡和詩

中都樓觀舊登臨佳句難酬兩翰林白石丹書陰洞古
青山王氣煖煙深感時自有懷鄉恨得祿誰無戀主心

莊舄當年名亦顯
病人不改越人吟

過五河縣

水到五河東北流
河邊人立看仙舟
醒來紙筆有新作
亂後衣冠非舊遊
蝸角地爭蠻觸國
鳳凰山是帝王州
從今四海無征戰
野老能為擊壤謳

過龍窩驛

龍窩驛近鼓聲催
轉柁落帆沙岸隈
共指深淵是空洞
豈無神物待雲雷
風晴楊柳如看畫
水綠蒲萄始發醅

浩蕩好懷春色裏詩成南鴈忽飛回

中都早行

雞鳴登前途白日未出海堠傍坐之久扶桑發光彩安
知雲霧起倏忽陰晴改我行正愁雨亟去復奚待此意
難重陳無由訴真宰

過池河驛

蕭蕭牧鳴馬鱗鱗輓征車人生各有役我何念安居東
岡上初日霧暗未光舒依依見亭堠曖曖經村墟我足

日已趼我僕力已痛自非得神仙豈免勞形軀

過太山

赤日當中天炎夏勢方盛孰知陰已生動物氣先應揮
汗登太山抱膝坐危磴蟲吟與蟬咽滿耳入秋聽君子
識幾微於焉發深微

宿大柳樹驛

柳驛夜寥聞空庭樹扶疎逢人兩無語獨坐臨前除明
月俄在膝好風又吹裾微吟復誰和幽抱聊自攄入室

就衾枕蛩響四壁虛展轉不能寐起聽雞鳴初

過清流關

昨日太山嶺今日清流關謂非大行坂所歷亦險艱前
瞻何突兀後顧猶巔岼下或墮地底上或登雲端筋力
詎能及十步九嗟嘆願言御冷風安得生羽翰

鳳陽東關

東關發船煙霞開城郭山川何壯哉長淮千里出桐柏
慶雲五色近蓬萊漢廷書生有賈董梁園詞客皆鄒枚

自嘆無才日
樗散金門退
食尚遲迴

高郵夜泊

城樓月出見觚稜
城下官河夜欲冰
返照疎林皆野燒
殘星別浦是船燈
腐儒食祿曾無補
倦客思家已不勝
春雨五湖煙水濶
荷蓑歸去下魚罾

揚州

遠水疎星影動搖
西風落木景蕭條
傷心一片船頭月
猶照揚州廿四橋

揚州城下是官河
春雨春風自綠波
欲問繁華舊時事
太平遺老已無多

老翁能說太平年
曾見江南進士船
打鼓掛帆揚子岸
人人盡道是登仙

城門疎柳噪寒鴉
柳外青旗是酒家
無復春風舊桃李
行人不必問瓊花

侍從親王之國大
梁代祀嶽瀆陵寢與宋季子奉
祠偕行至鄭州分道

天香滿袖散氤氲自覺祠官思不羣我望洛中山尚遠
子行河北路初分翩翩並馬遊三日去去孤鴻隔片雲
久許精誠可相照祝釐萬一報吾君

京索道中

路從京索上陂陀於此勞人感慨多徒割鴻溝分楚漢
終歸隆準一山河大風沛邑臺中筑半夜虞姬帳底歌
千載興亡俱寂寞羣山起伏自嵯峨

夜宿鄭州

昔騎官馬來管城關夫走報將軍迎牛車今夜民家宿
落莫何曾問姓名姓名碌碌何足問要知蠻貊行忠信
橐底寧須陸賈金腰間不必蘇秦印我慚二子人所榮
誰於寵辱能不驚萬里得歸貧亦足只消妻子事蠶耕

洛陽七里橋命兒還大梁是日風霾大作晚色忽

開一詩自遣

我老西行幾日還歸心隨爾過嶠關晚晴掃得離愁去
穩坐車中飽看山

過澠池問路于叟叟指罷兵臺

秦趙會盟之地

青山四顧似環滁千載荒城百戰餘問路罷兵臺下去

邑人能說藺相如

華陰駐馬橋

絕谷層闌路屈盤斜岡側嶂石巒岼今朝駐馬橋頭立

華岳三峯正面看

入益門

蜀關秦嶺路初分疊嶂層厓日易曛飛棧下臨千尺澗

行人上出半山雲
高堂煙霧曾貪畫
險道風湍却厭聞
萬里敢辭筋力盡
捐軀未足報吾君

過鳳縣簡主簿徐敏

城門人迹沒蒿萊
城上青山四面開
土物只看鸚鵡賣
邑人空說鳳凰來
三年簿領心如水
十歲兒童癭似柘
賦得詩成寫厓石
欲留姓字刻蒼苔

過沔縣

山川良是昔人非
馬上興懷駐夕暉
漢賊未平諸葛死

韓仇已報子房歸君臣會合時難得忠義分明事或違
千古悠悠何限意詩成不覺雨沾衣

過五丁峽

涉水復涉水登山復登山行行不計程日日山水間及
茲五丁峽蜀道方險艱水多洪濤惡山有亂石頑梁摧
乃能渡梯絕無由攀我馬毛已焦我僕力已孱豈因筋
骨勞而使涕洟潛幽林好鳥鳴聽之心自閒西南六詔
地此去何時還斯須敢忘君咫尺不違顏願承風八翼

直上天九關

合州

合州樓前江水合合州樓外青山匝倚樓西望雨冥冥
順水船來飛兩楫閬州山水天下稀不如合州可忘歸
街頭彷彿吳門市人家瓦屋白板扉買魚沽酒醉今夕
相逢誰是吳門客雞鳴風雨夢初醒隣機軋軋村舂急

銅梁縣

銅梁縣庭公事少銅梁縣市官橋小上山下山石作街

街南街北人家好人家好農不好商生男嫁女不出鄉
香芹煮羹飯有稻木棉紡絲衣有裳陳郎邀我青樽滿
情多已覺迴鞭懶酒酣欲寫銅梁謠百錢買筆紫羅管
夜宿走馬鋪

銅梁百里入昌州水竹村村山更幽走馬亭中看明月
不知今夜是中秋

海上白雲如白波天涯無奈月明何遙知今夜閨中看
比我天涯淚更多

大足縣

稻滿平疇水滿渠
舍南舍北竹疎疎
吳儂莫說吳中樂
到處青山好卜居

方池鵝鴨亂晴波
豐草牛羊散暖坡
如此山居元不惡
我生何地著雲窩

宿榮昌縣田家書所見

田家無桑蠶不育寒機
不奈蛩聲促陽坡種得木棉花
雨晴雪點秋雲綠
小姑大婦不梳粧
日日探花如採桑

青裙短短赤雙腳素手摻摻花滿筐歸來閉門月昏黑
燃薪代燭光照室姑拙紡車婦在機一夜不能成一疋
松州茂州道路難烏蒙烏撒雨雪寒丁夫運糧給邊餉
賣布易米還輸官田家不識紬與縠木棉未得裁衣服
何日邊城罷戰輸男耕女織萬事足

發瀘水

瀘水直流三峽去歸舟便好駕秋濤五雲東北空回首
萬里西南人不毛殊俗未知何地樂畏途誰念此生勞

淚痕滿袖和塵土留待山妻浣我袍

嵩明九日次井泉韻

天涯九日一登樓應是黃花笑白頭脫帽不妨同醉倒
拂衣安得便歸休山盤晴谷深藏寺水縮寒溪淺露洲
上馬荒城向昏黑莫教鼓角起邊愁

過呈貢縣

馬頭呀海口鼇背屹雲根鴈塔城南寺漁家水北村天
朝無外國地氣近中原願易伽宗部居官長子孫

晚至過逆村

隴樹千行立溪雲一縷生
登山復涉水正是蜀中行
地入臨安界山藏過逆村
夷門解迎客牽馬到柴門

夜宿禾泥田家

禾泥異白爨草閣面青山
勸酒月明裏笑歌開我顏
方語須三譯人情在一譌
關山離別苦此夜曲中多

山行

山行到絕頂野望豁平川
白見金沙雪青知鐵冶煙
怕

愁祇自遣耽句復誰聯不覺東回首懷人一惘然

野宿

野宿空山裏誰能不念家巢雲渾似鳥藉草忽驚蛇已
落南荒遠頻看北斗斜妻兒今夜夢那識到天涯

夜宿确犖

嵒峨一舍路确犖數家村月出四山靜我懷誰與論
邊塞風塵息山林日月閒禾泥田舍老曾戍部初關

過研和縣

溝洫空流水關山幾戰塵
研和百里邑無復有人民
過新興州

薏苡空牆晚芙蓉野水秋
馬頭山色好路入大棋州
過普舍

普舍今無縣營田尚有城
新軍飢欲死何力事春耕
宿昆陽

飲酒美人家出門山日斜
門前一株樹說是蜜檀花
宿晉寧

漢婦良家子從軍歲月多生來小兒女唱得楚人歌

昆明池

昆明海水不成潮一鏡涵空山影搖明月碧雞飛夜夜
白雲蒼狗變朝朝登臨未必南荒惡瞻戀其如北極遙
汀草汀花自春色無人同放木蘭橈

晚至安寧

連然驛路馬曾諳落日行人思不堪地極九州銅柱北
山蟠六詔鐵橋南南陽池水皆陰火鹽井烟中半夕嵐

回首蓬萊天萬里忍教塵鬢白毵毵

崑崙驛西山

千仞峯頭一振衣羣真有約莫相違清風咳唾人間落
白日羽翰天上飛玄圃自生珠樹老石田多是玉芝肥
吹笙子晉能騎鶴應向緱山月夜歸

至日煉象關

憶昔王門候曉鐘直廬銀燭照紗籠東方日射旌旗動
五色雲浮殿閣重白髮于今傷老大朱衣無復待從容

雞鳴拜舞瞻天遠寒霧濛濛萬壑松

早發祿豐驛

驛樓燈火見西屯使者出門人語喧
天寒馬渡此溪水月落雞鳴何處村
六詔山川皆郡縣百年身世任乾坤
若為看見梅花樹忽亂鄉愁入故園

過捨資關

山來絕厓虎跳躍路入半空蛇結盤
安得雲霄生羽翰直排閭闔獻琅玕
曉行函谷星初落晚渡輶轅雪正寒

所歷未知今日險何鄉能托此身安

廣通驛

路甸驛前溪水迴驛樓打鼓使臣來滿頭白雪歲月改
對面青山雲霧開萬里逢人相勸酒一身去國每登臺
醉看大字憶都督躍馬賦詩何壯哉

晚至楚雄

楚雄城郭暮雲間城上悲笳慘客顏僭國曾稱白鹿郡
居人猶說卧龍山葡萄直自張騫得薏苡空隨馬援還

金史卷一百一十五
卷一
今日封疆非漢土王師無地不平蠻

姚安醉歌

景雲僂屍李知古天寶召亂張虔陀唐兵莫討閣羅鳳
宋師不踰大渡河村村小屋雞狗少處處青山豺虎多
今日安危在諸將請君聽我姚州歌

自姚安出普湘

層關飛鞚出寒雲萬木歸鴉亂夕曛山自蜻蛉川口合
路從鸚鵡嶺西分道傍築室新城市塞上屯田久駐軍

遠客誰無鄉土念悲茄吹動不堪聞

過小雲南

眼明百里眺晴川洗我悲辛一迴然山氣成雲無五色
石光如鏡有千年荷戈戍士終懷土賣劍居民盡力田
自古華夷歸混一今人未必重開邊

白厓關

曉行清子川前月夜宿白厓關上雲宇宙有生俱是客
江湖無日不憂君人心可使豚魚應絕域真同鳥獸羣

飽煖殘年得强健未慚蠻府作參軍

過趙州

青山環抱水爭流行盡雲州入趙州四野耕耘多樂歲
諸蕃出候不防秋過橋花竹前村近入谷松蘿小寺幽
妻子誰能免相憶他鄉雖好莫淹留

入龍尾關

山為城郭海為池一卒當關萬卒窺越雋郡開通漢使
吐蕃兵結覆唐師只知地險如難服豈信天亡遂不支

歷覽華夷每懷古臨風倚馬讀殘碑

大理

西南形勝此山川蒙段偏安五百年聖主龍飛無僭竊
王臣虎拜有旬宣登臨已覺心神豁戰伐安能骨肉全
多幸遠民皆赤子夫耕婦饁戴堯天

留洱西驛因過三塔寺

眼中城郭與山川生我江南晝畫船雲氣半峯飛白雪
水光一鏡落青天野牆樓樹人家住官路梅花驛使傳

金定巳屋全言 卷一
最是禪房聽梵唄此心能洗百憂煎

鄧州驛

平岡走馬神摩洞荒驛聞雞鄧睽川丹壑洩雲朝翳日
玉泉陰火夜生煙一年殘厯愁來檢萬里新詩老去編
山水不殊人事異中原歸計正茫然

鶴慶驛會吳人馮廣文閩人林稅使

馬蹄蹴遍陰厓雪直向居庸塞外行日落忽聞牛背笛
川平始見鶴州城秋風千里萼絲滑暑雨三山荔子生

遷客相逢話鄉土天涯何限未歸情

麗江雪山

玉龍峯高九千仞日色晦明雲氣寒何當赤腳踏冰雪
更有紅顏生羽翰石洞僧來畫騎虎瑤臺仙去夜乘鸞
山靈於我豈無意一路天花落錦鞍

出龍尾關之永昌

崎嶇萬里入遐陬尚覺山川是壯遊倒海鯨波奔石馬
極天鳥道鑿金牛昔人於此成三窟老我而今隘九州

生入玉門班定遠未歸能不悔封侯

蘭滄江

曾觀樊綽雲南志今入蘭滄江上舟山自哀牢皆北向
水如瀾諾盡南流乾坤甕盎多蚊蚋蠻貊襟裾類馬牛
攬轡登高一回首悠悠何處望神州

萬箭樹

行人好怪亦何愚萬箭空存樹半枯一日風颭紛羽鏃
百年霜露此根株側身飛鳥驚還落抱子哀猿窮更呼

斬伐未能吾所憤獨騎官馬向山隅

永昌山行

陰崖積雪澗流冰自入哀牢感慨增老我只今諸事廢
此山從古幾時登武侯祠屋應難泯樊綽誌書猶足徵
縱到五天依象教不如三泖下漁罾

江頭絕句

勤苦南蠻子相迎遠出山短衣雙黑脰大耳兩金環
騎象豪酋出牽牛老父來馬頭風雨過一洗瘴烟開

山影東西合川聲日夜流片雲還作雨九月未成秋
蕉葉碧逾淨榴花紅更明知秋惟蟋蟀唧唧草間鳴
冰壺銀作頂食具竹為盤父老知蠻語兒童覩漢官
竹壺傾白酒草閣坐青山自笑居夷久逢人語亦蠻
跣行無履襪科首匪冠巾絕域親朋遠何由見故人
金盃冰蔗漿銀盤爛蕉黃食物豈不美不如歸故鄉
金盃阿刺吉銀筒速魯麻江樓日日醉忘却在天涯
小樹香櫟子疎籬區豆花人情悲異土物色似吾家

土俗諸蠻異人心一理同古今雞犬月南北馬牛風
孰知中國外民俗乃騶虞舞意存干羽歌情在袴襦
誰似夷民樂謹呼醉即狂婦人無妬忌兒女各成行
辛苦夷人婦魚籃各在腰紡絲還夜夜舂米亦朝朝
卉裳纏脰窄藤笠蓋頭圓日日清江浴生兒不記年
文錦腰間帶黃金頂上絲浣紗如越女解水似吳兒
絡臂銀絲釧纏頭白悅巾紛紛趁街子賣酒坐藤輪

到部後諭賊歸順野宿山行晚至晉寧州太守史

公留飲詩以記之

落日孤城小輕烟一水斜青山蒙氏臉綠樹夔人家絕
塞無來鴈荒城有噪鴉多情此州尹勸酒說京華

晚至昆陽州飲通守家土官留此州俟予至同宿
馬氏有隣婦李氏抱子攜酒而至賦此

晚次同酋長晨裝戒僕夫剝魚炊白飯繫馬與青芻但
喜人情合寧論土俗殊誰家小兒女直欲挽吾鬚

明發昆陽自此入山四望空寂情甚無賴因以自

遣

水窮山路轉雨斷塞雲迴
冉冉行人至荒荒落日催
百年消著屐萬事付銜杯
不識昆明底何人見劫灰

過嶠甸始見未泥蠻數家有
吏攜酒過水見土酋
飲道傍僕從皆飲酒盡乃行有作

山斷村纔見溪迴路忽迷
販茶非土獠勸酒是倭泥
碧樹排雲直青秧插水齊
欲忘鄉土念多事子規啼

晚宿山中與土酋共寢情亦真率因賦此詩

寂寂空巖夜淒淒急雨寒土酋分武帳山鬼怪儒冠天
欲勞筋骨人當見膽肝忘形自高枕睡熟夢金鑾

早行忽數人被甲持弩至道左俟土酋及見余或
揖或跪譯者曰此倚石村部民也期此地迎酋而
歸既而上馬從行至晚同宿山中賦此

部落皆亭障民岷盡卒徒甲兵無外侮弩矢有前驅擒
賊非難事安邊是遠圖君恩同雨露何地不需濡

雜種諸蠻部深山一野人樹枝低作屋松葉厚成茵自

祝身無恙誰知句有神生還見妻子話此益酸辛

以書詞招火頭忽納歸順詩以記之

徼外之官日山中慨屋初遊盤同鹿豕孚信及豚魚已
集投荒錄將馳諭賊書中原一萬里人事近何如

時忽納與死可伐刀木板皆已歸順山中無事與
長官飲劇偶成

舊釀筒能吸新詩藁未刪及瓜今日到行李幾時還風
雨家家碓烟雲面面山不因邊事息那得宦情閒

送別

送景德輝教授歸越中

斗酒都門別孤帆
水驛飛青雲諸老盡
白髮幾人歸風雨
魚羹飯煙霞鶴氅
衣溪山無限意予
亦夢柴扉

送韓縣丞之官

退朝無事坐讀易
索詩有客來扣門
每看新進諸才傑
都是故家之子孫
金蘭結交歲遲暮
玉樹照人天晏溫
百里寧非大賢路
一飯敢忘明主恩

送安處善司稅之官青州

買酒直傾囊底錢都門醉別意茫然人生白髮屢幾納
子去青州路一千鴉背夕陽江雨外馬頭秋色低雲邊
大梁東接齊封近書信頻煩使者傳

送月潭上人省母

日日慈烏啼樹林空山念母思難任了經夜月三花影
灑淚春暉寸草心遠道歸來塵滿屨高堂老去雪盈簪
衲衣便作斑衣舞自覺天倫樂意深

送紀善黃宗仁歸省閩中

王門朝並入官舍暮同歸子負明經學予慚竊祿譏有
言猶藥石相戒比絃韋念此交期久嗟時友道非挑燈
頻夜雨把酒及春暉不寐緣聽漏無錢即典衣茲晨陪
祖餞萬里問庭闈皆決閩山小心先越鳥飛白頭今老
大彩服更光輝樂意何終極離歌莫嘆唏水深鷺跼跼
風急馬駢駢路黑桄榔暗林紅荔子肥到家良願幸去
國亦瞻依樓閣雲長繞烟花露未晞謬隨書殿直頗覺

侍臣稀細訂涼秋約重來慎勿違

送錢仲沐赴京師

官舍五年居大梁

闕

人思故鄉詞伯而今無鐵史

門生何幸識錢郎渡頭打鼓船開驛花底捲簾書滿牀
未論心期又相別席上題詩煩寄將

送洧川李主簿被薦赴京師

儒生有策致時康送子城南別意長四十脫身辭簿尉
九重虛已問賢良杠梁往往農功後榆柳陰陰官路傍

消上曾過見佳政于今父老不能忘

送張長史往閩中收書籍

親王開國日清閒講殿同趨獨厚顏宿德造門如北海
善書留本似河間禁渠冰盡微波綠苑樹春生細蕊斑
珍重大夫南粵去滿船圖籍幾時還

送歐陽太守之官東昌

文忠孫子盡儒冠汝最華年拜好官白日錦衣行五馬
青雲彩翮翥孤鸞聞名何似承顏色握手誰能出肺肝

生別新知半悲樂他時書札報平安

傾蓋金陵白下門照人玉樹色清溫殿前禮樂三千字
海內文章六一孫雨露自天承紫誥風雲隨地送朱旂
山東到日應春社父老傳呼花滿村

送劉教授致仕歸金華

六十看山眼未昏草堂歸去卧煙村朝廷已許乞骸骨
衣食未須憂子孫上馬天風吹蓆帽落帆江月到柴門
美芹炙背區區意他日難忘獻至尊

送人致仕歸越

老臣殊荷聖恩寬詔許還家授散官賜杖未攜鳩玉小
誥綾新織朶雲團西窗夜雨銷紅蠟東閣晴山擁畫欄
子去我留寧不媿鑑湖他日請黃冠

賦觀魚臺送李濠州歸河北

莊周非惠子惠子非莊周二子濠上意固知魚樂否我
陪李使君聊復濠上遊漠漠野屋古悠悠淮水秋濠魚
不盈尺數罟日相求喁喁詎能樂政似蒼生憂吾祖養

魚作德與元化侔莊惠滿一哂撫掌風蕭颼使君將北
歸脫履巢雲丘濠州失父母遮道不可留涸轍無活鮒
深淵有潛虬徘徊下臺晚極目送孤舟

賦海珠寺送史倅之肇慶

泓然小滄海炯若明月珠樓閣起中央突兀金仙居夜
聞諸天樂時有羣龍趨誰謂黍米微大與八極俱矧茲
摩尼光一碧涵空虛府公或遊息賦詩懷抱舒清風吹
欬唾散落天南隅為政豈不勞聊復樂公餘去珠行南

還民命其少蘇

送李學正之易州為賦桃花崦

野性好林壑胡為來市鄺豈無桃花崦著我屋數椽深
深崦中花萬樹春霞鮮居民非避秦鼓腹戴堯天花間
長兒孫看花不計年我欲往求之路隔松蘿烟悵望小
孤峯玉立青娟娟相逢李博士頗似長庚仙江東事幽
討已有青鞋緣得官不厭冷幃然向幽燕振衣山上風
洗耳石間泉期君早歸來和我桃花篇

送王幼度待制致仕歸大梁應教

簪筆三年直禁坡，揚鈴一日上淮河。
歸來疏傳黃金重，老去馮郎白髮多。
野陌早花纔點綴，官亭新柳已婆娑。
梁園到日春如海，兒子將軍奈樂何。

白髮紅顏七十齡，中原文物有儀刑。
君王晝日勤三接，博士春秋老一經。
宮錦賜來天上使，苑花開遍水心亭。
都門祖帳千年事，猶有聲光在汗青。

送終南道士還山

脫屣都門骨已仙
山中故物尚依然
寒窗火伏燒丹竈
暖谷烟生種玉田
一馬來齊萬物雙
龍化去歷千年
長生久視寧無訣
安得從師老後天

送日本僧遊五臺

中國有僧來日本
鐵船過海是耶非
三更地底金烏出
萬里雲邊白鶴飛
性本圓明能作佛
跡無拘礙已忘歸
五臺到日應殘臘
看取天花滿衲衣

送徵江倅朱克正赴京師

人皆云雲南卑暑故多瘴癘又云昆明地冬不苦寒
夏不苦暑無瘴也洪武丁卯冬十月予始至嵩明風
雪三日地氣與中原不大相異十有一月留昆明風
雪復作意向之所聞皆妄耶詢諸土人則曰當年未
始有雪今始雪爾予於是深有感乎邵子之言竊自
喜也適徵江倅朱克正之京師詩以餞別因以識予喜云
騎馬出城官路長滇池風雪正茫茫北來地氣符王化
南下天兵克鬼方土鼓汧樽皆禮樂氍毹椎髻已冠裳

重來莫道邊庭遠父老思君意不忘

送魚課使霍思誠赴京師

三年官守滯蠻荒萬里夢魂飛
大行居有馬韉留客坐
食無魚鮓寄親嘗
晴天梅樹常含霧
朧月山花不受霜
辭滿得歸人共樂
將詩送別意茫茫

送雲南通守朱紹祖考滿赴京師

城南城北作春遊
父老逢人說郡侯
田野只今無外事
衣冠何地不中州
馬頭紅雨花都落
海子白雲山欲浮

昨日新知今日別，可堪東望獨憑樓。

送雲南劉推官赴京師

恩承雨露出金鑾，不是南蠻罰典官。
六詔山川開郡縣，百年父老見衣冠。
吏無隳突民何幸，獄有平反母所安。
忽報政成將入覲，青雲回首送飛翰。

贈

栢峯為希仙道士作

何處仙家紫翠房，一峯煙雨栢蒼蒼。
羊眠白石雲根爛，

麝過青苔雨氣香羽節凌風天有籟綵囊盛露玉為漿
頭顱我已將華髮便欲傳君却老方

溪隱為友人作

練溪聞說草堂成擬托幽閒老此生楠樹秋風棋局晚
桃花春水釣絲晴羣鷗煙雨忘心跡一鷄雲霄薦姓名
為爾題詩翻自笑滄浪何日濯吾纓

臨清道隱為豫府饒紀善作

秋水一波清且深隱居誰識道人心流行不息終歸海

開闢俱生直到今川上曾聞尼父嘆源頭重感晦翁吟
何時一笑空明裏同照扁舟雪滿簪

贈商潛戴珪

釣澤可物色力田亦名科疇云山林士不為漢網羅有
客善沉晦古鏡垢弗磨行貨區寰中遠遊笑且歌驅車
大行坂挾柁揚子渦烟濤接溟滓空翠亘嵯峨險途亦
良苦勝覽不既多治生各有術藏器心靡他人疑望市
利爾自樂天和得酤百錢酒輒便兩頰酡乾坤一睥睨

萬物如爾何我昔巖壑居幽期結雲蘿今悲白黑染豈
幸青紫拖夷門官舍冷媿爾頻來過將詩勿浪傳為我
自吟哦

贈良醫楊士達

南京舊識楊醫師北來中都重見之親王紀善為作傳
護衛將軍能贈詩石田芝草白雲裏丹屋杏花春雨時
刀圭乞我脫凡骨身到玉堂應未遲

醫藥濟天死聲自聖神作大哉炎農德天地同廣博壽

域無扎瘥風氣固冲漠風氣一以開壽域日以索僵屍
或京觀餓莩多溝壑雖有盧扁徒莫補混沌鑿天地今
再初萬物方振躍恭惟吾皇心夕惕憂民瘼五福用敷
錫四海翕清廓矧子醫師良仁術在所擴短章匪為贈
於子意不薄

贈眼科俺都刺

人生妙處惟青盧光明不息照八區胡為蝦蟆蝕白月
欲以象罔求玄珠青囊繫肘甚奇秘金篦刮膜只斯須

吁嗟世俗盲五色俺師俺師絕代無

贈莊浪王鎮撫

左陳書史右弓刀誰道邊城軍務勞
萬馬秋風肥苜蓿一鷗春水醉葡萄
山山部落西戎靜夜夜旌旗北斗高
政是太平無事日不妨詩態憶吾曹

贈吏隱

我志本伊傳我學非申韓胡為窘簿書
得匪負衣冠聖哲動以時否泰識其端
卷舒則在我何適非所安冉冉

鴈驚趨助龍蛇蟠曠心遺困辱沉迹遠疑患關門古
有令封疆亦有官公庭有執籥澗阿有考槃請渠勿投
筆努力以加餐

九我堂為王彥麟賦

匪親曷有我有我能無親我當供我職我情莫我申父
生母鞠畜長育我拊循出入又腹我反覆顧我勤親恩
有如此罔極同蒼旻兒心若寸草胡能報陽春七閩去
六詔不翅越與秦母髮鏡中雪父骨山下墳祭掃曠歲

時定省缺晨昏瞻望悲行役何怙哀鮮民上山山有顛
涉水水有津悠悠百年內孝子難具陳

立春前一日壽左布政鸚居張先生

好風明月自東來歲酒先霑栢葉杯元氣機緘生萬物
壽星光燄燭三台漢廷盡對賢良策董子獨懷王佐才
願使斯民樂長治熙然鼓腹上春臺

五十儒臣兩鬢絲政緣赤子切寒飢化行南詔同中國
道在西銘覺後知賓幕梅花春意早公堂栢樹午陰遲

偕躋壽域蒼生願載拜稱觴豈我私

巽隱集卷一

欽定四庫全書

巽隱集卷二

明 程本立 撰

題

題風木堂卷

男兒徒食祿親沒為誰榮
竟抱終天憾深違愛日情
九原雙淚徹萬事一毫輕
最是堂前木悲風日夜生

題李典儀雲東卷

母老今猶健
兒行久不歸
一官淹白首
萬里夢斑衣
越郡東溟濶
秦關西日微
只將雙淚眼
日日看雲飛

題鶴湖草堂卷為況伯章司稅

飛塵不到鶴湖邊
隱者堂成似列仙
弱水蓬萊三萬里
人民城郭一千年
煮茶風雪烟浮樹
載酒空明月滿船
此趣直忘身與鶴
揚州何意問腰纏

題君山別業畫卷為黃伯昂

畫圖林壑起雲煙
使者高懷寄靜便
背郭真成浣花屋

看山如坐洞庭船
柴門黃葉鄰僧掃
石徑蒼苔野鹿眠
如此故巢勞遠憶
只應頭白是歸年

題天竺曇敷上人法華山房卷

曇師法華室只在鑑湖邊
白日開三竺清光出五蓮
海龍曾聽呪庭鳥亦知禪
一月雲牀宿吾生信有緣

題黃氏山水小畫

暇日景廣文邀予遊黃氏莊
黃氏兄弟觴予亭中請名其
園因名之曰成趣
酒半復出山水小畫三軸
索詩遂賦二絕

用松雪翁倭硯試郭杞墨書畫上在坐者廣文與竺曇敷也
青山綠樹有樓臺春水晴天一鏡開興發不因尋賀老
酒船那得過湖來

忘機得與白鷗親春雨汀洲杜若新一笑題詩山水畫
不知身是畫中人

題吳門孝子卷

股剗兒可忍病去母能存不是輕遺體其如感至恩秋
風多在樹夜雨自生萱今日終天戚衣襟滿淚痕

題紫陽書屋畫卷為鮑掾

朱子道鳴濂洛後紫陽山竝華嵩高生民不被當時澤
從祀方從後世褒封事萬言焚諫藁棹歌九曲付漁舸
看君圖畫增予感千里雲林悵望勞

題劉士平竹所卷

鳳凰溪頭十畝園我昔種竹竹已蕃
掃除雜亂扶正直不使惡類相牽援
春雷動地兒孫長森然玉立參天上
玄冬何嫌霜霰重赤日自慙風颭爽
一從宦轍梁宋遊

煇埃眯目揮汗流琉璃八尺誰捲送琅玕一箇不可求
腐儒本非食肉相十年歸夢隨吳榜餘生未了苜蓿盤
此身須付桃枝杖永嘉劉郎思故山有廬亦在萬竹間
覓我狂歌托幽抱歌成轉覺俱愁顏長竿把得谿頭釣
短簫吹作江南調此時燒筍飯劉郎噴案不妨同一笑

題山水釣魚小畫

人間萬事一絲輕江上數峯雙眼明老我不歸空看畫
秋風又到洛陽城

題竹石小畫

玉堂仙人松雪公寫竹正似石室翁雲林道人雖出後
往往落筆生秋風吳人好書仍好畫百年遺墨千金價比來
何處得此圖松雪雲林此其亞娟娟嫩玉纔數莖烟稍雨葉縱
復橫洞庭寒骨沉水底鐵索下取蛟龍爭却憶江南舊池館筆
牀棋局何蕭散一行作吏事便廢十年不歸魂欲斷松雪子孫
今幾人雲林弟子誰逼真得歸故鄉倘相覓竹枝掛我頭上巾

題望雲圖

清漳黃宗仁為周府紀善其尊人栢軒先生年已八十餘道遠弗能就祿養宗仁嘗以使事經河山間見白雲南飛因駐馬久之夷山孫述古為作此圖以識其不忘乎親之意宗仁徵予詩予故以狄公言之庶覽者知圖之所由作也洪武十六年癸亥十月初吉程本立書

憶弟杜陵恨思友陶翁情矧茲登太行能不懷所生天倫孰為重孝感莫非誠無形恒有視豈直雲英英依雲睽親舍益使憂抱縈斯人已千載簡冊垂令名披君望

雲圖今古一章程誰獨非人子令我心惇惇

題張德麟活水軒卷

川流雖浩浩泉出廼涓涓地勢東南下河圖一六先淨
心涵湛碧探理入幽玄我學如潢潦詩成益惘然

題嚴氏蒼蒼樓嚴氏子陵後也今居上虞山中樓
名蓋取范文正公雲山蒼蒼之句云

嚴陵灘下水潺潺千載高名宇宙間風節最稱東漢士
子孫猶隱上虞山滄江烟雨羣鷗沒落日雲霄一鳥還

好倚樓居同極目久淹官署獨何顏

題墨桃

天台美人紅雪肌玉洞春深曾見之今日風沙吹面黑
出山不似在山時

題畫

瀑雪青天落松濤白日飛罷琴成獨賞得趣在忘機
山水東南好持竿我亦曾只今江海上何地著嚴陵

題梨花錦鳩圖

章葆字德玉金華人也蚤歲北遊嘗仕祕府今已七十餘矣流落梁宋間衣食不能給然精明強健不減昔時非泰然自處者不能也時寫翎毛花果生意入神曲阿眊履道持梨花錦鳩圖徵予詩且言其為人若此因識其語于詩之左欲知德玉者當求之丹青粉墨之外也洪武十九年丙寅二月乙卯程本立書別愁歸恨是清明眼眯風沙白髮生縱有花枝如畫裏看花不似少年情

萬花深處語黃鸝
花底能無挾彈兒
自在兩鳩春寂寂
一枝晴雪立多時

題畫送人歸越中

十年歸夢落滄波
一日飛帆渡浙河
指點南山最青處
故巢依舊白雲多

題山水畫

白雲載青山
青山欲飛去
瀟瀟石間泉
沉沉谷中樹
得非匡廬遊
無乃天台路
願與幽人期
逍遙歲年暮

艤舟上層臺抱膝寄遐想飛鷗閃餘暉秋色淒蒼莽山
川豈不好歲月忽已往悲來一長嘯旋颭激清響

題友人剡溪書屋畫卷

好買山陰二頃田草堂只住剡溪邊誰無白飯魚羹吃
未有青鞋布襪緣萬壑烟霞晴看畫五更風雨早朝天
乞身得遂南歸願雪夜懷人即放船

題子昂煙波歸興圖

此生只合住湖州罷得微官任白頭盡買太湖三萬頃

烟波隨處著漁舟

題浦舍人畫梧桐竹石

雲林弟子浦長源風雪相逢白下門請寫江南山水窟
著我讀書秋樹根

錦石成山花滿川子孫一旦鬻平泉疎篁古樹蒼厓雪
茅屋看來已百年

題三餘齋卷送錢掾還鄉

白門送客日已斜車馬塞路風吹沙金印何須大如斗

錦城不如早還家
雨夜空庭惟木葉
雪晴深谷有梅花
三餘齋中自足樂
閉門讀書雙鬢華

題興平教諭羅時可西山清嘯集

西山老人鬚髮蒼
舒嘯直登千仞岡
應谷大聲穿石裂
旋風遺響入雲長
江流赤壁空寒月
樹倚蘇門幾夕陽
今古英豪本同調
不勝遐想接微茫

烏撒題畫四絕

鵲鵲

急難思我弟萬里各漂零原上西風急傷心見鵲鴝

白頭翁

烏鬢天萬里客鬢不禁秋自在高枝烏胡為也白頭

杜鵑

啼血口流丹月明花影寒不堪愁裏聽只好畫中看

雙燕

不歸江上宅烟柳暗春郊多媿雙飛燕年年覓舊巢

題徐景暘趨庭卷

景暘散騎舍人父
任雲南右布政使

柱石老臣持使節芝蘭兒子拜親闈九重天語傳丹陛
五色雲章製彩衣官舸夜帆風力便壽觴春酒雪花飛
人生一樂真難得沉爾名家世所稀

題陳谷賓思親卷

春雨白魚江水深夕陽烏鳥塞垣陰誰無遠道思親淚
不及高堂念子心五色斑衣雲滿袖百年華髮雪盈簪
如何此樂恒難得陟岵詩成感至今

題夢彩堂大理推官馮思齊氏自為監察御史時

扁其堂曰夢彩洪武廿一年歲次戊辰冬予過大理思齊以卷徵詩

身上綵衣今夜夢囊中繡線舊時縫
兩眼忽迷雲五色八翼直飛天九重
袖翻蝴蝶春階舞盤斫鯉魚朝饌供
百年此樂人間少睡起倒裳聽禁鐘

題韓伯時壽藏卷

自營壽穴松林護預乞墓銘厓石鐫
四海交遊幾人在百年宇宙一身全
判山容與花時酒剡水溟茫雪夜船

去住何鄉非樂土死生今日任蒼天

老來斑鬢謝朝簪買得青山有賜金
汗簡文章千古事
繭窩骸骨百年心
冰霜舊栢烏羣集
風雨小松龍一吟
蒲裏車輪鳩刻杖
蒼天有待意何深

題王理問宜休亭畫卷

老來多病懶衣冠結得閒亭日倚闌
豈為好名聊傲世
正緣知止欲辭官
三更海氣雲霞赤
六月樹聲風雨寒
歸到閨中舊臺觀
不須山水畫圖看

題凌景南春露軒

憶昔園林春露時高堂慈母看孤兒金莖願得承仙掌
玉屑和來獻壽卮潤入錦棚生竹笋濕沾斑袖滴花枝
於今怵惕興悲感恍若音容一見之

母櫬扶來魄未安春山草木露漙漙松間曉滴花還破
薤上陽晞淚不乾舊宅魚泉空有井小囊熊膽尚留丸
構軒題扁情何極乞得詩銘後代看

題畫龍

水底或沉盈尺梭天際忽騰千丈波神靈變化固莫測
世能豢之奈爾何

題畫菜

酒酣夜發清冰甕朝罷春霑白玉盤十載舊恩天上夢
一根生意畫中看

題山水小畫

太湖三萬六千頃七十二峯湖上山草閣酒醒風雨過
棹歌聲在水雲間

江南不到幾秋螢風壑雲林夢草亭萬里乾坤雙老眼
他山不似故山青

題望雲卷

幾見夕陰天際合恒瞻曉氣日邊開百年只願斑衣著
五色何當玉女裁下土蒼生渴霖雨邊城白髮走塵埃
陳情倘許排閭闔歸到庭闈心尚孩

題郭掾未仲軒卷

親喪不葬孤兒罪聲欲徹天成永號一日九原封馬鬣

百年萬事付鴻毛
秋風白髮身今老
寒食青山夢轉勞
家園賣瓜歸去好
墓廬攀栢種來高

題山水畫送人歸楚

西南六詔山無數
多在蠻烟瘴雨間
不似故鄉歸去好
洞庭湖上看君山

題百鳥圖

燕雀安知鴻鵠志
鳳凰豈同雞鶩羣
君看九十九禽外
一禽舉翮摩青雲

題劉中雲海蓬萊軒

誰信劉卽是謫仙行軒不減洞中天蛟龍噓氣成樓閣
島嶼餘波見市廛鶴到詩壇通遠信人憑棋局惜流年
卜居自愛三山好贏得烟波滿目前

題蔡氏同壽堂

八荒仁壽域四海太平時盤古乾坤久華胥日月遲長
年非大藥至樂在標枝總是吾君力蒼生恐未知

雜詠

費孝子詩

蔡河冰堅夜苦寒將軍上馬重裘單誰知一卒獨念母
解衣卧冰良足嘆剖冰求魚魚易得有母不見供誰食
萬事無如子母全一寒敢為形骸惜爾雖不自惜天也
寧無知一朝有王命爾求母任所之山川邈邈荆湖路
兒行遑遑母何處澧州城邊求得之母髮蕭蕭已垂素
初逢不覺淚交頤却話兵戎始別時一失鄉閭二十載
只今誰在誰孤嫠奉母還居蔡河上人力胡能神所相

王恩不特賜之金且復其身俾終養新婦從夫未識姑
額天一誠夫與俱兒能負米婦能爨返哺不媿禽中鳥
宋朝孝子河中倅蘇公文章傳海內江南流落孝僧詩
鮮于草書稱近代軍中小卒誰所譽金華作傳不我誣
忠臣孝子何代無嗚呼忠臣孝子何代無

尋劉集賢隱居

方瞻紫錦屏條覽青玉案茲山亘百里我行山未半餘
雪雲俱白新泉冰始泮春姿動晴壑好鳥自相喚探幽

會披榛紀勝欲濡翰西投集賢里息鞅日已旰衣冠拜
遺老使我發深嘆垂世貴立言有竹青可汗

乳石詩

象賢奉常得異石於演樂堂典寶周翁識之云道州
乳石也奉常欣然以詩見遺余嘗怪李翰林集有云
荊州玉泉山多乳窟中有白蝙蝠飲乳水而長生其
大如鴉典寶荆湘人欲一問之未暇也今以道州乳
石言之則荊州乳窟可知矣然又聞王烈入山得石

髓青泥流出隨手堅凝氣味如杭飯按仙經云服之
壽齊天地竊謂髓之與乳皆石之脂也髓其凝者乳
其液者乎服髓者壽則蝙蝠飲乳而不死亦無足怪
矣獨未知遯世長生之徒亦有服乳而長生者乎因
賦詩畲奉常并呈長史公且欲質諸典寶翁也

聞道山中乳窟多乳泉流處石為窠洞門到夜飛蝙蝠
驛路何年載索駝野色忽看新崕嶺水痕猶認舊漩渦
豈無青髓香如飯老我黃塵奈爾何

喜晴

夜雨朝晴喜欲狂
西屯騎馬過東岡
不妨逐兔爭牽狗
切莫驅狼使牧羊
野日孤營無細柳
天風十月有枯桑
歸來又飲將軍酒
一醉都令世慮忘

齋宿皇陵夜起俟王駕

濟濟肅冠佩
隱隱聆和鸞
彤庭炯斜月
松柏颯以寒
神
山衛皇陵左右
龍虎盤
孝思穆宸衷
王心豈遑安
秋嘗
日維吉夙駕
夜未闌
駿奔執籩豆
臣亦備祠官
所職在

誠恪匪曰盛容觀斯言告在列同心臭如蘭

登封至日

登封一室青山下長至千宮玉陛前赤脚欲凌神蓋雪
朱衣曾惹御爐煙慚無袞職絲毫補願祝皇圖億萬年
靜坐寒窗看義畫經筵或者問韋編

莊浪王鎮撫省先墓於永嘉道經大梁持卷索詩
隨筆塞命

秦之山越之水將軍去家五千里南雲飛北風起將軍

憶親何日已男兒得祿不逮養有淚直徹黃泉底嗚呼
秦之山越之水錦衣煌煌照桑梓九原有知能不喜

出使錢塘收書籍發大梁

奉使南行曉出關回瞻宮殿紫雲間鄉里那從枉道入
圖書只載滿船還百年艮嶽塵飛海八月胥濤雪湧山
一到錢塘一懷古鄂王墳下淚潺湲

簡寶雞王二尹

南經險道入褒斜十步躋攀九嘆嗟奇駿舊曾分上廐

蹇驢今欲借東家渭河夜雨鳴清瀨秦嶺朝雲化紫霞
萬里一官誰見憶天涯更復有天涯

戲咏石餅

予行至土門鋪無炊具日已午未早食從者陳祥擇
一石圓如礮者置火中少焉裹石以麪煨熟之剥麪
食予曰此名石裹堆也予因名之曰石餅詩以識之
我心匪石不可轉鍊石作餅心彌堅自看一丸凝白雪
誰將五色補青天縮蔥侍御世所鄙金椒道士骨已仙

鉛金砂汞苦難得不如服此能延年

東堤鋪見桂花因憶故園雙桂

故園雙桂樹初成將比吾家兩弟兄封植敢忘先子志
急難誰念此時情山濃山淡皆秋色人笑人歌共月明
獨把一枝思骨肉天香三嗅淚縱橫

溧陽二月罌粟花盛開花皆千葉紅者紫者白者微
紅者半紅者傳粉而紅者白膚而絳唇者丹衣而
素純者殷如染茜者一種而具數色絕類麗春譜

之所云余念昔居吾鄉有亭芙蓉浦上亭外罌粟
三畝許花惟單葉紅白二色而已後忝親王禮官
從駕自京師之國大梁此花無異吾鄉茲焉流落
萬里人事不及而植物遇之不勝感時戀舊之私
賦詩二首

二月昆明花滿川麗春別種最芳妍青黃未著罌中粟
紅白都開地上蓮逐客形容嗟老矣美人顏色笑嫣然
馬頭初見情多感吟得詩成莫浪傳

善聞東風不作寒
米囊花似夢中看
珊瑚舊是王孫玦
瑪瑙猶疑內府盤
嘶過驂騑金匱匣
飛來蛺蝶玉欄干
瘴烟窟裏身今老
春事傷心思萬端

滇陽病起

書籤藥裏客窗間
一月吟成病裏閒
日日相看好顏色
人情誰得似青山

天涯病後命如絲
豈復形容似舊時
有客相辭汴州去
傳聞政恐到吾兒

病後戲東章廣文

巉然瘦骨鬢髮扶杖前廊力未堪欲問故人章博士
為誰騎馬出城南

病中謝劉大有曹廷珪見過

城南僦屋小如舟貧病誰能慰旅愁薄俗久知無管鮑
新交何幸得曹劉

已巳至日用煉象關韻

夢裏猶疑聽禁鐘起來山色曉雲籠三年蠻徼逢長至

萬里君門拜九重
斑白祇添新鬢髮
丹青誰寫舊儀容
窮愁博得身强健
晚節深期雪後松

洪武九年歲丙辰二月十日被擢秦王禮官十七
日同秦晉燕王府官僚召見奉天門下各賜馬一
疋楮幣有差惶悚感激退而賦詩

小步騶駟細織棧
羣僚拜賜赤墀前
玉門關外年年貢
金水橋邊一一牽
周制天閑元十二
衛詩駉北亦三千
不才駑鈍知何補
多幸青雲早著鞭

職幣司存九府間流行如水積如山鹿皮薦璧侯王入
蚨血塗錢子母還盛世理財元有道小臣蒙賜獨何顏
弊裘羸馬仁三族晏子為人亦未慳

吾鄉富友文擢順慶府同知三年升保寧府知府
以七十致仕順慶經歷陳暹會予于京師言其事
喜詩賦之

陳郎相見石城隅能說吾鄉富大夫白髮衣冠歸洛社
蒼頭琴鶴出成都仰天閭闔猶能拜步月欄干不用扶

何日得從諸老後年年春酒勸屠蘇

富老還家自蜀川蜀民能說府公賢朝廷吏重二千石
鄉里人稀七十年花雨小車東郭去竹涼高枕北窗眠
請看五福陳洪範造物於公賦予全

觀梅分韻得枝字

只道花如雪何如鬢亦絲客中今日臘眼底去年枝地
暖春歸早江寒月出遲詩情似何遜惆悵立多時

狀元黃分韻得載字

曲江探花宴春事今安在
粲粲霜下傑正色獨不改
郝林有丹桂擅色已千載
晚節孰與倫汝價當十倍

晚興分得淨字

晚興重留客風流繼觴詠
座移脩竹深徑掃蒼苔
淨秋聲屋邊起月色雲中
迸富貴未足論且以安吾
命

得影字

秋風絡緯啼金井月色樓
臺漏聲靜美人遠在天一
方何以慰我心耿耿玉闕
不夜嫦娥老銀漢欲冰河
鼓冷

強把相思托鳳簫小階吹轉梧桐影

得塘字

夜雨不濕泥曉雲低度牆嚶嚶鳥求友我情曷能忘蔡
氏雅敬客羣士集中堂及茲春節宴所忻在餘芳長吟
何紆徐短歌或慨慷從來文學交豈徒弄盃觴華風蕩
碧草綠水沈迴塘嗟我咏歸樂孰與曾點狂

惜日短歲十二月二日同諸友訪環中老鮑恂于
西溪隱居蒙留款談論懽洽豈無一言以記之遂

命題云各賦一首嗟夫在心為志發言為詩觀其所作蓋可見矣

我志在千古此生無百年百年亦苦短白日如奔川
光陰旦復旦把鏡心茫然歷看古賢傑勲業照簡編
安能不努力坐待雪滿顛義和駕六龍為我遲遲鞭

酬和

鵬日值雪次貝先生二十韻

霰零初淅瀝雨灑復廉纖只道花如絮那知木有鹽亂

飄隨滿地斜舞巧穿簾父老驚銀甕兒童得玉蟾湯泉
應已凍火井詎能炎一氣何舒慘羣黎任愛嫌垣墉堆
易圯坑坎積逾添鵝鴨隍池靜貔貅府衛嚴夜窗貧展
卷曉漏誤傳籤休矣門誰立昭乎闕自瞻昆崙愁折柱
華嶽恐埋尖晴色先浮瓦寒聲或墮簷蜀蛆疑石化海
鼠只冰潛坐食慚倉庾啼飢嘆里閭陽春君寡和歲酒
我先拈瑤草將持贈瓊茅試用占貢犀知物遠賜錦望
恩霑宮額看梅綴農情待麥蘄梁園諸客盛司馬獨才

兼却笑烹茶者家姬未屬厭

李子奉祠浚井得奇石次韻

偶從深井得原是太湖來良嶽無仙仗昆明有劫灰忠
臣厲齒泣貞婦望夫回不勝懷古意點筆賦崔嵬

致此江湖遠于今歲月深摩挲悲良嶽指點看雲岑烟
霧含餘潤風雷起太陰崢嶸見君意貞確比吾心

暫歸故鄉和友人見寄

拾遺徒步得南歸千里風塵一布衣為報鄉人莫相笑

大夫元不志輕肥

和張德駱紀善初度韻

東風驛騎始南還
晚興留人食尚寒
泰華黃河觀未了
陽春白雪和皆難
山香舞處花如雨
海月飛來玉作盤
但願此身俱老健
年年此日共清歡

飲酒沔縣市中走筆次劉忠江韻

郢曲彌高和轉難
酒酣拔劍氣如山
誰憐騏驥鹽車下
不在君王十二閑

歸田後次友人正旦早朝韻

騎馬天街踏雪晴銀幡猶記入新正
歸來一室青山郭夢到羣仙白玉京
波煖柳風迴太液露晞花日上承明
題詩曾應親王教五色春雲筆底生

和貝惟學登小孤山

西來風浪湧金山人在鴻濛沆瀣間
大地小孤天柱石長江第一海門關
鮫人夜泣珠成淚龍女晴梳翠作鬟
欲問靈巫報神語我行何日定東還

述懷

春日值雪述道中鄙懷

河山開國大風雪趣裝嚴闕樹容車憶天花拂帽簷路
驚深峪轉衣索弊裘添鱗甲飄逾亂毫釐雨或纖凍龜
誰為藥寒痺孰能砭夜宿催爐火晨興問漏籤沙畱鷗
跡印泥逐馬蹄粘宜麥曾聞諺連茹況得占眼明看白
皙心切為蒼黔陽長今當盛陰凝已足嫌微生同燕雀
逝景惜烏蟾一命才猶忝諸公德可漸簡須司馬授詩

許杜陵兼珠側知形穢膏餘被物霑入嶠疑隴蜀渡洛
似沱潛華藻非三謝丹青媿二閭春晴動鵲鵲月色夢
蜚廉專對吾何取能卑吏愈謙別來旬朔改坐覺歲時
淹郢曲雖難和家醪會共拈

久雨述懷

次張長史韻

閃閃夜多電瞠瞠朝復風大梁六月雨日夜聲淙淙陰
陽有縱閉天人相感通因思黃河決昔者原武東長隄
蟻穴壞尚足嬰其衝遂令耕桑地濤瀾漲春容去年夏

不雨禱祠走府公誰能罪真宰我欲鞭豐隆得非傷稼
穡曾莫寬租庸今年雨不止將無河決同徒聞萬姓號
未覩百穀豐天心寧匪仁帝德豈不洪庶乎形氣和蕩
彼氛祲空腐儒謬食祿治生在歸農燮調閣大體憂憤
誠小忠況垂齒髮暮敢覩班資崇三嘆詠君作載歌激
予衷

寄

寄弟并示壻吳氏

聞道南塘旱吾家正可憂不能供賦稅豈得免征求舊
宅荒苔雨先瑩宿草秋急難須努力更與阿騏謀

續得鄉人信再寄弟

聞道溪田熟如今刈穫無還能足家食且不負公租八
月來黃雀三江出紫鱸新炊兼異味老我憶歸吳

洪武丁卯春侍從親王朝京寄宋季子

詩翁金石奏對客我能誦翁亦哦我詩松泉響幽洞王
門七年久雞鶩隨鴈鳳同抱愛君心義與丘山重于今

事何及生死銜悲痛我尚卧京華翁已歸梁宋逢人巨
舊歡即事生新夢彷徨中夜起丹白銀河凍春風汴橋
柳醵酒釣州瓮輕衫雪羅製小騎青絲鞚斯遊豈不樂
老我無由共冥冥北飛鴻目極千里送

七月九日葭萌道中寄宋季子奉祠

聯步常年近赤霄千秋佳節慶今朝星明南極聽更漏
日上東方立早朝華夢樓前猶夢到葭萌道上欲魂銷
仰天自祝吾王壽回首中原悵望遙

戊辰七月九日用葭萌道中韻再寄宋季子奉祠
蓬萊簇仗逼雲霄葵藿傾心豈一朝玉體願期王自愛
金閨憶與子同朝盃餘壽瀝波曾及袖有天孫霧已銷
風雨五更孤夢斷江湖萬里一身遙

寄嵩明倅嵩明倅祖原善予鄉人也予卧病昆陽
原善以公事來日相過旅次意甚懇別後寄此以
寫予懷

年將五十已龍鍾百病交攻氣不充羨爾高年精力在

鬢毛霜白面霞紅

天涯相見故鄉人一話江南一愴神
那復錦鴛湖上醉
畫船簫鼓鬧青春

風雨山窗客枕孤
東方欲曙鳥相呼
無人更似嵩明倅
日日能來問病夫

苦憶嵩明祖判官
無由兩臂挿飛翰
此身強健須相覓
醉舞青天白玉盤

留別

次韻貝原翬留別

原翬鄉先生貝廷珍仲子也兄弟五人三人出仕兄
原憲都府經歷弟季翔楚府紀善原翬今宰武安邑
以考滿赴京師相見于大梁因賦詩留別

客裏逢君說故鄉留連樽酒過斜陽漢時循吏稱三異
馬氏佳兒識五常老去只驚搔鬢短醉來不覺放歌長
明朝相送城南路記取槐陰四月涼

五年官舍汴州城一見鄉人一愴情賴有寒氊留客坐

可無春釀與君傾
北來山水登臨倦
南去音書感慨并
何日吳淞江上住
兩蓑烟雨釣舟橫

發嵩縣留別守禦千兵邑庠教諭

嵩州官舍留三日
日日亂山雲吐吞
聞雞夜看北斗柄
借馬曉出東城門
廣文無種坐賓客
將軍有書傳子孫
我懷先世此鄉里
願聚族人居陸渾

之官雲南留別大梁親友

一身去中原萬里
投南詔敢辭瘴癘
入得匪神明誚精

忠膽弗渝日月諒能照生還詎無期老學益自幼親知
念行役執酒請予醵毋為臨岐惻但作出門笑踟躕城
西路指點雲外嶠有詩頻寄君盡寫所歷妙

懷古

龍德宮故基懷古

海子三山帶彩霞上皇頻駐五雲車豈知花石窮民力
只擬蓬瀛作帝家中國一朝非宋土北風萬里盡邊沙
只今遺跡令人感剩水荒丘落日斜

河堤懷古

落日黃河岸兒童看使臣雲封龍伯樹風旋馬頭塵蕩
蕩中原地熙熙上古民如何三代下風俗再難淳

桐溪古跡

雪佛碑

天花墮虛空平地忽三尺異哉西方神現此水精域胎
非托摩耶意巨勞刻畫乃瞻白玉相安用黃金飾一洗
熱惱心悉依清淨力紅日起扶桑終焉化無跡其無本

非空其有亦非色君看東逝波滄海不可測我來鳳凰
溪古寺久荆棘摩挲雪佛碑碑斷字莫識金石亦已壞
況非金石質萬事等泡影感之三嘆息

洗馬池

房星下照天池水水光一碧淨如洗驂騑何來塵滿身
解却金羈濯清泚不識誰人樂少年春風柳下曾揚鞭
驂騑忽爾化龍去空餘池水淒寒烟我聞渥洼在西極
此水得名徒遠憶却憐駿骨世間稀佇立池邊三嘆息

建炎槐

千尺高槐舊相門傳聞南渡此移根
心經百歲風霜苦身受三朝雨露恩
破穴中霄經電火繁陰六月似雲屯

池臺錦繡知何在幸爾青青尚獨存

鳳鳴梧

梧桐生高岡亭亭凌紫霄鳴鳳丹山來
依此百年喬良材中琴瑟和聲合簫韶
我非漢中郎詎識爨下焦

龍眼池

寶地多奇蹤雙池鑿龍眼秋水涵遠空寒波應靈響陰
雲翳或結夜月晴兼朗對此長湛然塵心自蕭爽

迎鳳橋

鳳過桐溪水溪橋迎鳳名光搖錦翮動影落彩虹明夾
岸梧桐老芳洲杜若生尚餘千古迹登覽一傷情

惠雲塔

老禪西來兜率宮金曇舍利開芙蓉平地起作寶光相
七級上凌天九重摩尼頂珠現穹碧丹霞掩映難足峯

八牕玲瓏懸皎月層欄翠滑扶神龍我欲乘虛求帝釋
雲梯高峻紅塵隔簷鈴停語寂籟冷白鶴飛下蒼煙夕

浴鳳沼

鳳鳥從何來來止桐溪旁錦毛濯春雨綵翮晞朝陽蘋
藻動浮彩蘭芷吹幽香鳳去今不返空餘鷗鷺行

橫湖

橫湖如足練風景此中稀日暖赤鱗躍天晴白鳥飛寒
松蟠石岸春水沒苔磯幾度斜陽晚漁舟渡口歸

東山

陟彼東土山惘然思謝安
草露濕我衣海日升巖巒愧
無如花妓醉舞追前歡
飄飄谷風來吹墮頭上冠

桐溪

梧桐蔭清溪溪水波粼粼
上有五色鳥下有黃金鱗
秋雨洗白石春風生綠蘋
願學羊裘子時來垂釣緡

遊覽

登通海湧金山

西湖上馬湧金門三竺歸來日色昏
今古羣生幾塵劫
華夷萬里一乾坤
烟蘿花木山中寺
水竹茅茨海上村
兩地登臨渾似夢
賦詩聊與楚僧論

遊龍潭陪臨安府官僚

臨安山水似江南
天氣況當三月三
往往揮毫逢鶴楚
行行騎馬過龍潭
載歌白雪誰能和
試飲清泉亦不貪
記取人家畫欄曲
桃花一樹倚春酣

登雲南城樓

漢武開邊事可稽滇池遠在夜郎西已聞郊廟歌朱鴈
復道山川醮碧雞王業無如今日盛才名孰與古人齊
自慚作賦非司馬萬里登高意欲迷

輓

嘉禾輓呂太常母

平川呂孝子有母四德全葛覃誦勤儉中饋事精專夫
君既捐世嫠居甫踰年魚軒竟長往晏逐瑤池仙愁雲
暗北邙荒草埋新阡諸孤守墓廬有涕徹重泉感我歌

此曲臨風亦淒然

辭曲歌

孤凰辭

有序

嘉禾梧桐鄉之鳳鳴里節婦朱氏生子焯一歲而寡
今年二十餘矣讀書孝其母故為此辭

高岡兮梧桐鳳凰兮雌雄忽失鳳兮凰將曷從梧既悴
兮霜露多凰失鳳兮可奈何心雖哀兮矢靡他惟巢有
雛兮始生哺之覆之兮俟其成雛五色兮儀虞廷凰雖

孤兮心則寧

楊花曲


君不見陳宮美人張麗華春情輕薄似楊花
兵塵吹入景陽井荒城老樹啼寒鴉
又不見隋堤一千三百里煬帝龍船壓
春水錦帆飛不到天涯腥風戰血楊花裏
噫嗟陳與隋山川雖是國已非
年年三月楊花飛江南江北啼子規

滄海白雲歌為姑蘇陸弘道作

誰言黃河之水東流到海不復迴海潮日日去復來誰
言天上白雲斯須改變如蒼狗日日白雲飛海口海潮
日日來有期白雲日日海口飛滄灣親舍白雲下天涯
遊子何時歸

清平樂題駐履道所畫桃花送琴士蒯文達歸山
山翁歸去玉洞花千樹拍手兒童花下路驚動落花無
數山中紅雨蒼苔人間白髮黃埃借問玄都道士劉郎何
日重來

山翁歸去記得來時路雨漲溪泉人不渡花外鳥啼何
處人間不是山中高懷都付絲桐一曲瑤池宴罷春
風吹盡殘紅



巽隱集卷二